

# 偵探白晝



上海會文堂新記書局印行



## 偵探指南序

林君出示所輯偵探指南。而乞余爲之序。余曰。方今偵探多矣。隨口說人亂黨。有何不可。欲做偵探。做偵探耳。何待君之指教哉。林君曰。惟其無真正之偵探也。故我作偵探指南。余曰。彼翻譯本之偵探小說多矣。何嘗不可作偵探指南。讀何待君之煩心哉。林君曰。惟其不合于吾國之人情風俗也。故我作偵探指南。予曰。有如是夫。然則子之書不虛作矣。吾即舉此言爲之序。若夫書之內容。有目共賞。不待吾贅也。寄塵氏序。

偵探指南序



# 偵探指南目錄

聞聲辨姦法

食羹起疑

冶工證明妄言之原因

破驗鼠矢

害人適以自害

偵破假命案之法

殺人嫁禍者之被偵

偵驗殺死與燒死之法

於供口卷牘中偵察破綻

舉動間探出計謀

罪人忽然召用

偵出賊中之秘密

辨別冒認物主

查驗同謀

偵辨真兇之法

州官偵破栽誣案

一語定讞

發明荊花入魚羹之毒物

鑿金變土塊

偽藏主

誘令訟姪

誘供之法

用祝枝山讀春聯之讀法以偵破遺囑中之隱義

奪產服罪

判服殺子逐妾之毒婦

偵破假冒爲父之偽證據

爭子者之判明

姊妹易子

辨別物主

唆使之證明

羊皮中之鹽屑

蒲團中銀屑

日記簿之妙用

證明攀誣

小門子之偵探

偵查盜賊法三則

盜偵探之發覺

殺馬割牛之偵探法

偵辨冒醫賊

誘盜牛賊

奪靴賊之偵誘法

竊金賊之偵誘法

偵察竊米賊

偵察盜茄賊

偵察盜櫻賊

質庫偽銀案

以刀偵犯

誘吐真供

偵獲掘金賊

菜葉有字

劫綃賊之偵誘法

竊衣賊之偵辨法

偵察盜瓜賊

偵察盜石榴賊

偵破姦案十一則

騙者自承

以屍易婦

國家圖書館



001686073

以術辨盜

井中屍

竹叢屍

木工之冤獄

雙釘記

化裝假面之盜

王令治獄

謀猺

猺間諜

人造雷殛之奇聞

滴血作弊之說破

借磨察姦

僕婦串盜之黑幕

拐殺伏誅

姪欲占嬸

偵破串陷案之手續

嘉慶間謀死親夫之大偵探案

道光間粵桂大偵探案

咸豐間浙江大偵探案



# 偵探指南

## 聞聲辨姦法

鄭子產晨出過東匠之間聞婦人之哭撫其御之手而聽之有閒遣吏執而問之則手絞其夫者也異日其御問曰夫子何以知之子產曰其聲懼凡人於其親愛也始病而憂臨死而懼已死而哀今哭已死不哀而懼是以知其有姦也

## 舉動間探出計謀

齊桓公合諸侯衛人後至公朝而與管仲謀伐衛退朝而入衛姬望見君下堂再拜請衛君之罪公曰吾於衛無故子曷爲請對曰妾望君之入也足高氣彊有伐國之志也見妾而有動色伐衛也明日公朝揖管仲而進之管仲

日君舍衛乎公曰仲父安識之管仲曰君之揖朝也恭而言也徐見臣而有慚色臣是以知之君曰善仲父治外夫人治內寡人知終不爲諸侯笑矣桓公之所以匿者不言也今管子乃以容貌音聲夫人乃以行步氣志桓公雖不言若暗夜而燭燎也

食羹起疑

樂羊爲魏將而攻中山其子在中山中山之君烹其子而遺之羹樂羊坐於幕下而啜之盡一杯文侯謂堵師贊曰樂羊以我故而食其子之肉答曰其子而食之且誰不食樂羊罷中山文侯賞其功而疑其心

罪人忽然召用

孟孫獵得覺使秦西巴載之持歸其母隨之而啼秦西巴弗忍而與之孟孫

歸。至。而。求。覺。答。曰。余。弗。忍。而。與。其。母。孟。孫。大。怒。逐。之。居。三。月。復。召。以。爲。其。子。傅。其。御。曰。曩。將。罪。之。今。召。以。爲。子。傅。何。也。孟。孫。曰。夫。不。忍。覺。又。豈。忍。吾。子。乎。故。曰。巧。詐。不。如。拙。誠。樂。羊。以。有。功。見。疑。秦。西。巴。以。有。罪。益。信。

### 冶工證明妄言之原因

宋。人。有。請。爲。燕。王。以。棘。刺。之。端。爲。母。猴。者。必。三。月。齋。然。後。能。觀。之。燕。王。因。以。三。乘。養。之。右。御。冶。工。言。於。王。曰。臣。聞。人。主。無。十。日。不。燕。之。齋。今。知。王。不。能。久。齋。以。觀。無。用。之。器。也。故。以。三。月。爲。期。凡。刻。削。者。以。其。所。以。削。必。小。今。臣。冶。人。也。無。以。爲。之。削。此。不。然。物。也。王。必。察。之。王。因。囚。而。問。之。果。妄。乃。殺。之。冶。人。謂。王。曰。計。無。度。量。言。談。之。士。多。棘。刺。之。說。也。

### 偵出賊中之秘密

朝歌賊寧季等數千人攻殺長吏屯聚連年州郡不能禁民以詔爲朝歌長始到謁河內太守馬稜願假轡策勿令有所拘閔及到官設三科以募壯士自椽史而下各舉所知其攻劫者爲上傷人偷盜者次之不事家業者爲下收得百餘人詔爲饗會悉貫其罪使入賊中誘令劫掠乃伏兵以待之遂殺賊數百人又潛遣貧人能縫者傭作賊衣以綵線縫其裾爲識有出市里者吏輒擒之賊繇是駭散

破驗鼠矢

孫亮出西苑方食生梅使黃門至中藏取蜜漬梅蜜中有鼠矢亮問主藏吏曰黃門從汝求蜜耶曰向求之實不敢與黃門不服左右請付獄推亮曰此易知耳令破鼠矢裏燥亮曰若久在蜜中當濕透今裏燥必黃門所爲于是

黃門首服

辨別冒認物主

傅玟仕齊爲山陰令有賣鍼賣糖二老姥共爭團絲詣琰玟取其絲鞭之密視有鐵屑乃罰賣糖者又云野父爭雞玟各問何以食雞一云粟一云豆乃破雞得粟罪言豆者

害人適以自害

李靖爲岐州刺史或告其謀反高祖命一御史案之御史知其誣固請與告事者偕行數驛詐稱失去原狀驚懼異常鞭撻行典乃祈求告事者別疏一狀比驗與原狀不同即日還以聞高祖大驚告事者伏誅

查驗同謀

崔思競則天朝。或告其再從兄宣謀反。付御史張行岌按之。告者先誘藏宣。妾而云。妾將發其謀。宣乃殺之。投屍洛水。行岌按略無狀。則天怒。令重按。奏如初。則天怒曰。崔宣若實曾殺妾。反狀自明矣。不獲妾如何。白雪行岌懼。逼思競訪妾。思競乃于中橋南北多置錢帛。募匿妾者。數日略無所聞。而其家每竊議事。則告者輒知之。思競揣家中有同謀者。乃佯謂宣妻曰。須絹二百疋。僱刺客殺告者。而侵晨伏于臺前。宣家有館。客姓舒。婺州人。爲宣家服役。宣委之同于子弟。須臾見其人。至臺。賂閹人以通于告者。告者遂稱崔家欲殺我。思競要館客於天津橋。罵曰。無賴險獠。崔家破家。必引汝同謀。何路自雪。汝幸能出崔家。妾我遺汝五百縑。歸鄉足成百年之業。不然亦殺汝必矣。其人悔謝。乃引至告者之家。搜獲其妾。宣乃得免。

## 偵破假命案之法

定州流人解慶賓兄弟坐事俱徙揚州弟思安背役亡歸慶賓懼後役追責規絕名貫乃認城外死屍詐稱其弟爲人所殺迎歸殯葬頗類思安見者莫辨焉有女巫楊氏自云見鬼說思安被害之苦慶賓又誣疑同役兵蘇顯甫李蓋等所殺經州訟之二人不勝楚毒各誣服獄將決李崇者州捕也疑而停之密遣二人爲州內所識者僞從外來詣慶賓告曰僕往北州北有一人見過寄宿夜中共語疑其有異便卽詰問乃云是流兵背役姓解字思安時欲送官苦見求并稱有兄慶賓今住揚州相國城內嫂姓徐君脫矜愍爲往告報見伸委曲家兄聞此必相重報今但見質若往不獲送官何晚是故相造君欲見願幾何當放令弟若其不信可隨往看之慶賓悵然失色求其少

停此人具以報崇攝慶賓問之引服因問蓋等乃云自誣數日之間思安亦爲人縛送至崇乃召女巫令視之巫無言鞭笞一百

偵辨真兇之法

歐陽曄治鄂州民有爭舟至相毆至死者獄久不決曄自臨其獄出囚坐庭中去其桎梏而飲食訖悉勞而還之獄獨留一人于庭留者色動惶顧公曰殺人者汝也囚不知所以曰吾觀食者皆以右手持匕汝獨以左今死者傷在右肋此汝殺之明驗也囚泣服罪

殺人嫁禍者之被偵

殷雲霽字近夫知清江縣民朱鎧死于某廡中莫知殺之者忽得匿名書曰殺鎧者某也某係鎧素仇衆咸謂不誣雲霽曰此嫁害以緩治也因問左右

與。鎧。素。狎。者。誰。對。曰。胥。姚。雲。齋。乃。集。羣。胥。于。堂。曰。我。欲。寫。書。各。呈。名。字。有。姚。明。者。字。類。匿。名。書。詰。之。曰。爾。何。殺。鎧。明。大。驚。卽。服。供。曰。鎧。將。販。於。蘇。獨。吾。知。之。利。其。貲。故。殺。之。耳。

### 州官偵破裁誣案

程。戡。知。處。州。民。有。積。仇。者。一。日。諸。子。謂。其。母。曰。母。今。且。病。恐。不。得。更。議。請。以。母。死。報。仇。乃。殺。其。母。置。仇。者。之。門。而。訴。於。官。仇。者。不。能。自。明。戡。疑。之。僚。屬。皆。言。不。足。疑。戡。曰。殺。人。而。自。置。於。門。非。可。疑。耶。乃。親。自。劾。治。具。得。本。謀。

### 偵驗殺死與燒死之法

張。舉。爲。句。章。令。有。妻。殺。其。夫。因。放。火。燒。舍。詐。稱。夫。死。於。火。其。弟。訟。之。舉。乃。取。猪。二。口。一。殺。一。活。積。薪。焚。之。察。死。者。口。中。無。灰。活。者。口。中。有。灰。因。驗。夫。口。果。

無。灰。以。此。鞠。之。妻。乃。服。罪。

一語定讞

湖。州。趙。三。與。周。生。友。善。約。同。往。南。都。貿。易。趙。妻。孫。不。欲。夫。行。已。鬧。數。日。矣。及。期。黎。明。趙。先。登。舟。因。太。早。假。寐。舟。中。舟。子。張。潮。利。其。金。潛。移。舟。僻。所。沉。趙。而。復。詐。爲。熟。睡。周。生。至。謂。趙。未。來。候。之。良。久。呼。潮。往。促。潮。往。趙。門。呼。三。娘。汝。家。三。官。何。久。不。來。孫。氏。驚。曰。彼。出。門。久。矣。豈。尙。未。登。舟。耶。潮。復。周。周。甚。驚。異。與。孫。分。路。徧。尋。三。日。無。蹤。周。懼。累。因。具。牘。呈。縣。縣。尹。疑。孫。有。他。故。害。其。夫。久。之。有。楊。評。事。者。閱。其。牘。曰。叩。門。便。叫。三。娘。子。定。知。房。內。無。夫。也。以。此。坐。潮。溺。罪。乃。服。

於供口卷牘中偵察破綻

楊茂清爲江南貴池知縣。池濱大江，使傳往來如織。民好鬻訟，茂清因俗爲治。且遇事明決。時涇縣有王贊者，逋青陽富室，周鑑金而欲陷之。預搆一丐婦，蓄之鑑室，索金輒殺。婦誣鑑，訊者以鑑富爲嫌，莫敢爲白。御史以事下郡，郡檄清往按閱其獄。詞曰：見知何不指卑隣，而以五十里外麻客姓名引爲之證乎？又云：其妻伏贊背，護贊何能毆及胸脅死乎？已乃訊證人，稍稍吐實。詰日至屍所，益審居民，則贊門有溝，溝布掾爲橋。陽出婦與鑑爭墮橋而死，贊乃語塞而鑑得免。

### 發明荆花入魚羹之毒物

單縣有田作者，其婦餉之食畢死。翁故曰：婦意也。陳於官，不勝箠楚，遂誣服。許襄毅公時官山東，曰：獄其有寃乎？乃親歷其地，出獄囚徧審之。至餉婦，乃

日。夫。婦。相。守。人。之。至。願。鳩。毒。殺。人。計。之。至。密。者。也。焉。有。自。餉。於。田。而。鳩。之。者。哉。遂。詢。其。所。饋。飲。食。所。經。道。路。婦。曰。魚。湯。米。飯。度。自。荆。林。無。他。異。也。公。乃。買。魚。作。飯。投。荆。花。於。中。試。之。狗。彘。無。不。死。者。婦。寃。遂。白。

甕金變土塊

李。沂。公。勉。鎮。鳳。翔。有。屬。邑。耕。夫。得。裏。蹄。金。一。甕。送。於。縣。宰。宰。慮。公。藏。之。守。不。嚴。置。於。私。室。信。宿。視。之。皆。土。塊。耳。甕。金。出。土。之。際。鄉。社。悉。來。觀。驗。遽。有。變。更。莫。不。駭。異。以。聞。於。府。宰。不。能。自。明。遂。以。易。金。誣。服。雖。詞。款。具。存。莫。窮。隱。用。之。所。以。案。上。聞。沂。公。覽。之。盛。怒。俄。有。筵。宴。語。及。斯。事。咸。共。驚。異。時。袁。相。國。滋。在。幕。中。俛。首。無。所。答。沂。公。詰。之。袁。曰。某。疑。此。事。有。枉。耳。沂。公。曰。當。有。所。見。非。判。官。莫。探。情。僞。袁。曰。諾。俾。移。獄。府。中。閱。甕。聞。得。二。百。五。十。餘。塊。遂。於。列。肆。索。金。

溶。瀉。與。塊。相。等。始。稱。其。半。已。及。三。百。觔。詢。其。負。擔。人。力。乃。二。農。夫。以。竹。擔。舁。至。縣。計。其。金。數。非。二。人。所。擔。可。舉。明。其。在。路。時。金。已。化。爲。土。矣。於。是。羣。情。大。豁。宰。獲。清。雪。

### 僞藏主

程顥爲鄂縣主簿。民有借其兄宅以居者。發地中藏錢。兄之子訴曰。父所藏也。令曰。此無證。佐何以決之。顥曰。此易辯。爾問兄之子曰。汝父藏錢幾何時矣。曰。四十年矣。彼借宅居幾何時矣。曰。二十年矣。卽遣吏取錢十千視之。謂借宅者曰。今官所鑄錢不五六年卽遍天下。此錢皆爾未藏前數年所鑄。何也。其人遂服。

### 誘令訟姪

李若谷守并州。民有訟叔者。稱叔因欲專攘財產。據爲一己所有。遂致堅不認。其爲姪李令民還家。毆其叔叔。果訟姪毆逆。因而正其罪。分其財。

誘供之法

咸通初。楚州淮陰縣東隣之民。以莊券質于西隣。貸得千緡。約來年加子錢。贖收及期。先納八百緡。約明日償足。方取券。兩姓素通家。且止隔信宿。謂必無他。因不徵納。緡之籍。明日齎餘鏹。至西隣。諱不認。訴于縣。縣以無證。不直之。復訴於州。亦然。東隣不勝其憤。聞天水趙和令江陰。片言折獄。乃赴而南。訴焉。趙宰以縣官卑。且非境內。因却之。東隣稱冤不已。趙曰。且止。吾舍思之。經宿。曰。得之矣。召捕賊之幹者數輩。齎牒至淮陰。只言獲得截江大盜。供稱有同惡。某請械送來。唐法惟持刀截江。隣州不得庇護。果擒西隣人。至。然自

恃農家實無他跡。應對頗不懼。趙脅以嚴刑。囚始泣。叩不已。趙乃云。所盜幸多金寶錦綵。非農家物。汝且籍舍中所有。辯之。囚意稍解。且不虞東隣之越。訟。遂詳開錢穀金帛之數。并疏所自來。而東隣贖契八百緡。在焉。趙閱之。笑曰。若果非江寇。何謂諱東隣八百緡。遂出訴隣。面質。于是慚懼服罪。押回本土。令吐契而後罰之。

用祝枝山讀春聯之讀法以偵破遺囑中之隱義

有富民張老者。妻生一女。無子。贅某甲于家。久之。妾生子。名一飛。張老常省呼之曰張一。育四歲。而張老卒。張病時。謂壻曰。妾子不足任吾財。當畀汝。夫婦爾。但養彼母子不死。溝壑卽汝陰德矣。于是出券書云。張一非吾子也。家財盡與吾壻。外人不得爭奪。壻乃據有張業。不疑。後妾子壯。告官求分。壻以

券呈官。遂置不問。他日奉使者至。妾子復訴。壻仍前赴證。奉使者因更其句。讀曰：張一非吾子也。句家財盡與吾壻。外人句不得爭奪。曰：爾婦翁明謂吾壻外人。爾尙敢有其業耶。詭書飛作非者。慮彼幼爲爾害耳。于是斷給妾子人稱快焉。

奪產服罪

韓億知洋州。大校李甲以財豪於鄉里。兄死。誣其兄子爲他姓。賂里嫗之貌類者。使認爲己子。又醉其嫂而嫁之。盡奪其貲。嫂姪訴于州。積十餘年。竟未有白。其冤者公至。又出訴。公取前後案牘視之。皆未嘗引乳醫爲驗。一日盡召其黨至庭下。出乳醫示之。衆皆服罪。子母復歸如初。

判服殺子逐妾之毒婦

于文。傳。遷。烏。程。縣。尹。有。富。民。張。某。之。妻。王。無。子。張。納。一。妾。於。外。生。子。未。啐。王。誘。妾。以。兒。來。尋。逐。妾。殺。兒。焚。之。文。傳。聞。而。發。其。事。得。死。兒。餘。骨。王。厚。賂。妾。之。父。母。買。鄰。家。兒。僞。爲。妾。所。生。者。以。證。其。殺。兒。之。無。據。張。幾。被。所。感。文。傳。卽。令。妾。抱。兒。乳。之。兒。啼。不。受。乃。呼。鄰。婦。至。兒。見。之。躍。入。其。懷。乳。之。卽。飲。至。是。妾。之。父。母。亦。吐。實。王。遂。伏。辜。

偵破假冒爲父者之僞證據

有。富。民。張。氏。子。其。父。死。有。老。父。曰。我。汝。父。也。來。就。汝。居。張。驚。疑。請。辯。于。縣。程。灑。詰。之。老。父。探。懷。取。策。以。進。記。曰。某。年。某。月。日。某。人。抱。子。于。三。翁。家。灑。問。張。及。其。父。年。幾。何。謂。老。父。曰。是。子。之。生。其。父。年。纔。四。十。已。謂。之。三。翁。乎。老。父。驚。服。

爭子者之判明

潁川有富室兄弟同居婦皆懷妊長婦胎傷弟婦生男長婦遂盜取之爭獄三年州郡不能決丞相黃霸令走卒抱而去兩婦各十步叱令曰取長婦抱持甚急兒大啼叫弟婦恐致傷因而放與而心甚悽愴霸曰此弟子責問乃伏

姊妹易子

陳詳知惠州郡民有二女嫁爲比鄰者姊素不孕一日妹生子而姊之妾適同時產女詭言產子夜燒妹傍舍乘亂竊其兒以歸妹覺之往索弗與訟于府無證祥佯自語必殺此兒事卽了耳乃置甕水堂下引二婦出曰吾爲汝溺此兒以解汝紛密諭一卒謹視兒而叱左右詐爲投兒狀亟逐二婦使出

其妹失聲爭救不可得。顛仆堂下。其姊竟去。不顧。祥卽斷兒歸妹。而杖姊妾。一郡稱服。

### 辨別物主

宣彥昭仕元爲平陽州判官。天大雨。民與軍爭笠。各認已物。彥昭裂而爲二。並驅出使。卒踵其後。軍忿譟不已。民曰。汝失笠於我。何與卒以聞。彥昭杖民。令買笠償軍。又范邨爲浚儀。令二人挾絹于市。互爭。令斷之。各分一半。去後遣人密察之。有一喜一慍之色。于是擒喜者。

### 唆使之證明

安重榮雖武人而習史事。初爲成德節度。有夫婦訟其子不孝者。重榮拔劍授其父母。自殺之。其父泣不忍。其母從旁詬夫而奪劍。逐其子。問之。乃繼母。

也。重榮爲叱其母出而從後射殺之。

### 羊皮中鹽屑

魏李惠爲雍州刺史。有負薪負鹽者。同弛擔憩樹陰下。爭一羊皮。各言藉背之物。惠曰。此甚易辨。乃令置羊皮于席上。以杖擊之。鹽屑出焉。負薪者乃服罪。

### 蒲團中銀屑

江淮省游平章顯公爲政清明。有城中銀店失一蒲團。後於隣家認得。隣不服。爭詈不置。游行馬至。問其故。嘆曰。一蒲團直幾何。失兩家之好杖。蒲團七十棄之可也。及杖得銀屑。遂罪其隣。

### 日記簿之妙用

周文襄公忱巡撫江南有一冊歷自記日行事纖悉不遺每日陰晴風雨必詳記人初不解一日有民告糧船江行失風公詰其失船爲某日午前午後東風西風其所對參錯公案籍以質其人驚服始知公之自記非漫書也。

### 證明攀誣

官校捕七盜逸其十盜首忘言逸者姓名俄縛十人至稱冤乃令置盜首庭下差遠而呼縛者踞堦上其足躡絲履盜數後窺之世貞密呼一隸蒙縛者首使隸肖之而易其履以入盜不知其易也卽指絲履世貞大笑曰爾乃以吾隸爲盜卽釋縛者。

### 小門子之密偵探

賊首王和尚攀出同夥有多應亨多那宰者饒悍倍于他盜招服已久忽一日應亨母從兵道告辨一紙准批下州中引王和尚爲證公思之此必王和尚受財許以辨脫耳乃于後堂設案桌桌圍內藏小門子喚三盜俱至案前覆審預戒皂隸報以迎賓館有客公卽舍之而出少頃還入則門子從桌下出云聽得王和尚對三賊云且忍兩夾棍俟爲汝脫也王盜惶遽叩頭請死

偵查盜賊法一

臨安有人家土庫中被盜者踪跡不類人出入總轄謂其徒曰恐是市上之弄獠獠者試往脅之伏則執之若不伏則令唾掌中如其言其人良久覺無唾可吐色變具伏乃令獠從天窗中入內取物或謂總轄何以知之曰吾亦不敢取必但人之驚懼者必無唾可吐姑以卜之幸而中耳又一總轄坐

在壩頭茶坊內有賣熟水人持兩銀杯一客衣服濟然若巨商者行過就飲總轄遙見呼謂曰吾在此不得弄手段將執汝客慚悚謝罪而去人問其故曰此盜魁也適飲湯以兩手捧盃蓋陰度其廣狹將作僞者以易之耳比韓王府中忽失銀器數件掌器婢叫呼爲賊傷手趙從善尹京命總轄往府中測視良久執一親僕訊之立服歸白趙云適婢瘡口在左手蓋與僕有私竊器與之以刃自傷謬稱有賊而此僕意思有異於衆是以得之

### 偵查盜賊法二

相傳維亭張小舍善察盜偶行市中見一人衣冠甚整遇荷草者捋取數莖因如廁張俟其出從後叱之其人惶遽鞠之盜也又嘗于暑月游一古廟之中有三四輩席地鼾睡傍有西瓜劈開未食張亦指爲盜而擒之果然或叩

其術張曰入廁用草此無賴小人其衣冠必盜來者古廟羣睡夜勞而晝倦  
劈西瓜以辟蠅也時爲之語云天不怕地不怕只怕維亭張小舍舍吳音後  
遇瞽丐於途疑而迹之見其跨溝而過擒焉果盜魁其瞽則僞也請以重賂  
免期某日過不至久之張復遇諸塗責以渝約盜曰已輸於臥床之左足但  
夜至不敢驚寢耳張猶未信曰以何爲徵盜卽述是夜其夫婦私語張始大  
駭歸視床足有物繫焉如所許數乘得一利刃悚然曰危哉乎自是察盜頗  
疏

偵查盜賊法三

天后時嘗賜太平公主細器寶物兩食盒值黃金百鎰公主納之藏中歲餘  
盡爲盜所得公主言之天后大怒召洛州長史問曰三日不得盜罪死長史

懼。謂。兩。縣。主。盜。官。曰。兩。日。不。得。賊。死。尉。謂。吏。卒。游。徼。曰。一。日。必。擒。之。擒。不。得。先。死。吏。卒。游。徼。懼。計。無。所。出。衢。中。遇。湖。州。別。駕。蘇。無。名。素。知。其。能。相。與。請。之。至。縣。尉。降。階。問。計。無。名。曰。請。與。君。求。對。玉。階。乃。言。之。于。是。天。后。問。曰。卿。何。計。得。賊。無。名。曰。若。委。臣。取。賊。無。拘。日。月。且。寬。府。縣。令。不。追。求。仍。以。兩。縣。擒。盜。吏。卒。盡。以。付。臣。爲。陛。下。取。之。亦。不。出。數。日。耳。天。后。許。之。無。名。戒。吏。卒。緩。至。月。餘。值。寒。食。無。名。盡。召。吏。卒。約。曰。十。人。五。人。爲。侶。于。東。門。北。門。伺。之。見。有。胡。人。與。黨。十。餘。皆。衣。縷。經。相。隨。出。赴。北。邨。者。可。踵。之。而。報。吏。卒。伺。之。果。得。馳。白。無。名。曰。胡。至。一。新。塚。設。奠。哭。而。不。哀。旣。徹。奠。卽。巡。行。塚。旁。相。視。而。笑。無。名。喜。曰。得。之。矣。因。使。吏。卒。盡。執。諸。胡。而。發。其。塚。剖。棺。視。之。棺。中。盡。寶。物。也。奏。之。天。后。問。無。名。卿。何。才。智。過。人。而。得。此。盜。對。曰。臣。非。有。他。計。但。識。盜。耳。當。臣。到。都。之。日。

卽此胡出葬之時。臣見卽知是偷。但不知其葬物處。今寒食節。拜掃計必出城。尋其所之。足得其墓。設奠而哭。不哀。則所葬非人也。傍塚相視而笑。喜墓無損也。向若陛下。迫促府縣擒賊。賊計急。必取之而逃。今者更不追求。自然意緩。故未將出。天后曰。善。贈金帛。加秩二等。

盜偵探之發覺

京師有盜劫一家。遺一冊。且視之。盡富室子弟名書。曰某日某甲會飲某地。議事。或聚博。挾倡云云。凡二十條。以白于官。按冊捕至。皆跣跣少年也。良以爲是。各父母謂諸兒。素不逞。亦頗自疑。詰羣少。飲博諸事。悉實。蓋盜每偵而籍之也。少年不勝榜毒。誣服訊贓。所在浪言埋郊外某處。發之。悉獲。諸少相顧駭愕。云天亡我。遂結案。俟決。一指揮疑之。而不得其故。沉思良久。曰。我左。

右有一髯。職豢馬耳。何得每訊斯獄。輒侍側。因復引囚。鞠數四。察髯必至。他則否。猝呼而問之。髯辭無他。卽呼取炮烙具。髯叩頭請屏左右。乃曰。初不知事。本末唯盜賂。奴令每治斯獄。必記公與囚言。馳報許酬我百金。乃知所發。贓皆盜得。報瘞之也。髯請擒賊自贖。指揮令數兵。易雜衣與往。至僻境。悉擒之。諸少乃得釋。

### 殺馬割牛之偵探法

李復亨年八十。登進士第。調臨晉主簿。護送官馬入府。宿逆旅。有盜殺馬。復亨曰。不利而殺之。必有仇者。盡索逆旅商人。過客同邑人。橐中盛佩刀。謂之曰。刀蟻馬血。火燬之。則刀青。其人歎伏。果有仇。以提刑薦。遷南和令。盜割民家牛耳。復亨盡召里中人。至使民家牽牛。遍過之。至一人前。牛忽驚躍。詰之。

乃引伏。

誘吐真供

錢澡備兵密雲有二京軍劫人于通州獲之不服州以白澡二賊恃爲京軍出語無狀澡乃移甲于大門之外獨留乙鞫問數四聲色甚厲已而握筆作百許字若錄乙口語狀遣去隨以甲入給之曰乙已吐實事由于汝乙當生汝當死矣甲不意其給也忽然曰乙本首事何委于我乃盡白乙首事狀澡出乙證之遂論如法。

偵辨賊冒醫

吉安州富豪娶婦有盜乘人冗雜入婦室潛伏床下伺夜行竊不意明燭達旦者三夕飢甚奔出執以聞官盜曰吾非盜也醫也婦有癖疾令我相隨常

爲用藥耳。宰詰聞再三盜言婦家事甚詳。蓋潛伏時所聞枕席語也。宰信之。逮婦供證。富家懇免不從。謀之老吏。吏白宰曰。彼婦初歸。不論勝負。辱莫大焉。盜潛入。突出必不識婦。若以他婦出對盜。若執之。可見其誣矣。宰曰。善。選一妓盛服。輿至盜。呼曰。汝邀我治病。乃執我爲盜耶。宰大笑。盜遂服罪。

### 偵獲掘金賊

溧水人陳德娶妻林。歲餘家貧。備於臨清林績麻。自活久之。爲左隣張奴。所誘意甚相愜。歷三載。陳德積數千金。囊以歸。離家尙十五里。天暮且微雨。德慮懷寶爲累。乃藏金於水心橋第三柱之穴中。徒步抵家。而林適與張狎。聞夫叩門聲。匿床下。旣夫婦相見。勞苦因敍。及藏金之事。比晨往而張已竊聽。啓後扉出。先掩有之矣。林心不在夫。旣聞亡金。疑其誑。怨詈交作。時署縣事。

者○普○江○吳○復○有○能○聲○德○爲○訴○之○吳○笑○曰○汝○以○腹○心○向○妻○不○知○妻○別○有○腹○心○也○  
拘○林○至○嚴○訊○之○林○呼○枉○德○憐○妻○願○棄○金○吳○叱○曰○汝○詐○失○金○戲○官○長○乎○置○德○獄○  
中○而○釋○林○以○歸○隨○命○吏○人○之○黠○者○爲○丐○密○造○林○察○之○得○張○與○林○私○問○慰○狀○吳○  
並○擒○治○事○遂○白○

誘盜牛賊

北○齊○高○澄○爲○定○州○刺○吏○有○人○被○盜○黑○牛○背○上○有○毛○澄○乃○詐○爲○上○符○若○甚○急○市○  
牛○皮○倍○酌○價○值○使○牛○主○認○之○因○獲○其○盜○

菜葉有字

定○州○有○老○母○姓○王○孤○獨○種○菜○二○畝○數○被○偷○澄○乃○令○人○密○往○書○菜○葉○爲○字○明○日○  
市○中○看○葉○有○字○獲○賊○嗣○後○境○內○無○盜○

### 奪靴賊之偵誘法

北齊任城王潛領并州刺史有婦人臨汾水浣衣及靴靴先刷新置河畔突有乘馬人竟換其新靴馳而去婦人無如之何乃持故靴詣州言之潛召居城諸嫗以靴示之給曰有乘馬人於路被賊殺害遺靴焉得無親族乎一嫗撫膺哭曰兒着此靴向妻家也捕而獲之時稱明察

### 劫絹賊之偵誘法

楊津爲岐州刺史有武功人齎絹三匹去城十里爲賊所劫時有使者馳驛而至被劫人因以告之使者到州以狀白津津乃下教云有人着某色衣乘某色馬在城東十里被殺不知姓名若有家人可速收視有一老母行哭而出云是已子於是遣騎追收並絹俱獲自是合境畏服

竊金賊之偵誘法

柳慶領雍州別駕。有賈人持金二十斤。寄居京師。每出常自執鑰。無何緘閉。不異而並失之。郡縣謂主人所竊。已誣服。慶疑之。問賈人置鑰何處。曰。自帶。慶曰。頗與人同宿乎。曰。無與同。飲乎。曰。日者曾與一沙門。再度酌宴。醉而晝寢。慶曰。沙門乃真盜耳。卽遣捕沙門。乃懷金逃匿。後捕得。盡獲所失金。又有胡家被劫。郡縣按察莫知。賊所隣近。被囚者甚多。慶乃詐作匿名書。多榜官門。曰。我等共劫胡家。徒侶混雜。終恐泄露。今欲首伏。懼不免罪。便欲來告。慶乃復施免罪之牒。居一日。廣陵王欣家奴。面縛自告。牒下。因此盡獲餘黨。

竊衣賊之偵辦法

胡汲仲在霄海。日有羣嫗。聚佛菴。誦經一嫗。失其衣。時汲仲出行。訟於前。汲

仲以牟麥置羣嫗掌中令合掌繞佛誦經如故汲仲閉目端坐且曰吾令神督之盜衣者行數周麥當芽中一嫗屢開視其掌遂命縛之果竊衣者

### 偵察竊米賊

僉都御史楊北山公名武關中康德涵之姊丈也爲淄川令善用奇邑有盜市人失米者求之不得公攝其鄰居者數十人跪之於庭而漫理他事不問已忽厲聲曰吾得盜米者矣其一人色動良久復厲聲言之其人愈益色動公指之曰第幾行第幾人是盜米者其人遂服

### 偵察盜瓜賊

又有盜田園瓜瓠者是夜大風雨根蔓俱盡公疑其讎家也乃令印取夜盜者足跡布灰於庭攝村中之丁壯者令履其上而曰合其跡者卽盜也其最

後一人。輾轉有難色。且氣促甚。公執而訊之。果儻家而盜者也。瓜瓠宛然在焉。

### 偵察盜茄賊

李亨爲鄞令。民有業圃者。茄初熟。隣人竊而鬻於市。民追奪之。兩訴於縣。亨命傾其茄於庭。笑謂隣人曰。汝真盜矣。果爲汝茄。肯於初熟時。並摘其小者耶。遂伏罪。

### 偵察盜石榴賊

秦檜爲相。都堂左揆前有石榴一株。每結實。檜嘿數焉。亡其二。檜佯不問。一日將排馬。忽顧左右取斧伐樹。有親吏在傍。倉卒對曰。實佳甚。去之可惜。檜反顧曰。汝盜食吾榴。吏叩頭服。

### 偵察盜櫻賊

有獻新櫻於慕容彥超。俄而爲給役人盜食。主者白之。彥超呼給役人僞慰之曰：「汝等豈敢盜新物耶？蓋主者誣執耳。勿懷憂懼。」各贈以酒。潛令左右入藜蘆散。既飲立皆嘔吐。新櫻在焉。於是伏罪。

### 偵破姦案十一則

江寧推官元絳攝上元。令甲與乙被酒相毆。甲歸臥。夜爲盜斷足。妻稱乙執乙詣縣。而甲已死。絳飭其妻曰：「歸治夫喪。乙已服矣。」陰遣謹信吏迹其後。望一僧迎笑切切。私語絳。命取繫廡下。詰妻奸狀。卽吐實。人問其故。絳曰：「吾見妻哭不哀。且與傷者共席而禱。無血污。是以知之。」又貞觀中。衡州板橋店主張迪妻歸寧。有衛三、楊真等三人投宿。五更早發。夜有人取衛三刀殺張迪。

其刀却內鞘中眞等不知之。至明店人追眞等視刀有血痕。因禁拷訊眞等。苦毒遂自誣服。上疑之。差御史蔣恒覆推恒命總追店人十五已上。畢至唯留一老婆年八十。至晚放出。令獄典密覘之。曰。婆出當有一人與婆語者。卽記其面貌。果有人問婆使君作何。推勘如此三日。並是此人。恒令擒來鞫之。與張迪妻奸殺有實。奏上。敕賜帛二百段。除侍御史又馬裕齋知處州。禁民捕蛙。一村民將生瓜切作蓋。剗虛其腹。實蛙於中。黎明持入城爲門卒所捕。械至庭。公心怪之。問汝何時捕蛙。答曰。夜半問有人知否。曰。唯妻知。公疑妻與人通。逮妻鞫之。果然蓋是人欲陷夫而奪其妻。故使妻教夫如此。又先誠門卒以故。捕得公遂置奸淫者於法。又參軍宋儋年暴死。范純仁使子弟視喪。小斂已鼻血出。純仁疑其非命。按得其妾與小吏奸。因以置毒鼈肉中。純

仁問食肉在第幾巡曰豈有既中毒而尚能終席者乎再訊之則儋年素不食鼈其曰鼈肉者蓋妾與吏欲爲變獄張本以逃死爾實儋年醉歸毒於酒而殺之遂正其罪又徽富商某悅一小家婦欲娶之厚餌其夫夫利其金以語婦婦不從強而後可卜夜爲具招之故自匿而令婦主觴商來稍遲入則婦先被殺亡其首矣驚定不知其由夫以爲商也訟於郡商曰相悅有之卽不從尙可緩圖何至殺之一老人曰向時叫夜僧於殺人次夜遂無聲可疑也商募人察僧所在果於傍郡識之乃以一人着婦衣居林中候僧過作婦聲呼曰和尚還我頭僧驚曰頭在汝宅上三家鋪架上衆出縛僧僧知語洩曰其夜門啓欲入盜見婦盛裝泣牀側欲淫不可得殺而攜其頭出掛在三家鋪架上拘上三家人至曰有之當時懼禍移掛又上數家門首樹上又拘

上數家人至曰有之當日卽埋在園中遣吏往掘果得一頭乃有鬚男子再掘而婦頭始出問頭何從來乃十年前斬其仇頭於是二人皆抵死又臨海縣迎新秀才適黃宮有女窺見一生韶美悅之一賣婆在旁曰此吾鄰家子也爲小娘子執伐成佳偶矣賣婆以女意誘生生不從賣婆有子無賴因假生夜往女不能辨一日其家舍客夫婦因移居而以女榻寢之夜有人斷其雙首以去明發以聞於縣令以爲其家殺之而橐裝無損殺之何爲乃問榻向寢誰人曰是其女令曰知之矣立逮其女作威震之曰汝奸夫爲誰曰某秀才逮生至曰賣婆語有之何嘗至其家又問曰秀才身有何記曰臂有痣視之無有令沉思曰賣婆有子乎逮其子視臂有痣曰殺人者汝也刑之卽自輸服蓋其夜捫得駢首以爲女有他奸殺之生由是得釋又李傑爲河南

尹有寡婦。訟子不孝。傑物色。非是。語曰。婦若子。法當死。得無悔乎。答子無狀。不悔也。傑乃命婦。出市棺爲歛。屍地而陰。令使踪跡之。婦出。乃與一道士語。頃之。棺至。傑捕道士。按之。故與婦私。而礙於其子。不得逞者。傑卽殺道士。納之棺。又包恢知建寧。有母愬子者。年月後。作疏。字恢疑之。呼其子。問泣不言。恢意。母媼與僧通。惡其子諫而坐。以不孝狀。則僧爲之也。因責子侍養。勿離跬步。僧無由至。母乃托夫諱。日入寺作佛事。以籠盛衣帛。出旋納僧籠內。以歸。恢廉知。使人要其籠。置諸庫。逾旬。吏報籠中臭。恢乃命沉諸江。語其子曰。吾爲若除此害也。又廣西南寧府永淳縣寶蓮寺。有子孫堂。傍多淨室。相傳祈嗣。頗驗。布施山積。凡婦女祈嗣。須年壯無疾者。先期齋戒。得聖召。方許止宿。其婦女或言夢佛送子。或言羅漢。或不言。或一宿不再。或屢宿屢往。因淨。

室嚴密無隙而夫男居戶外故人皆信焉聞人汪旦初蒞縣疑其事乃飾二妓以往屬云夜有至者勿拒但以朱墨汁密塗其頂次日黎明伏兵衆寺外而親往點視衆僧倉皇出謁凡百餘人令去帽則紅頭墨頭者各二令縛之而出二妓使證其狀云鐘定後兩僧更至贈調經種子丸一包汪令拘訊他求嗣婦女皆云無有搜之各得種子丸如妓乃縱去不問而召兵衆入衆僧懾不敢動一一就縛究其故則地平或床下悉有暗道可通蓋所污婦女不知幾何矣既置獄獄爲之盈住持名佛顯謂禁子凌志曰我掌寺四十年積金無算自知必死能私釋我等暫歸取來以半相贈凌許三僧從顯往而自與八輩從之既至寺則窖中黃白燦然恣其所取僧陽束臥具而陰收寺中刀斧之屬期三更斬門而出汪方秉燭構思詳稿忽心動念百僧一獄猝有

變莫支。乃密召快手持械入宿甫集。而僧亂起。僧所用皆短兵。衆以長鎗禦之。僧不能敵。多死。顯知事不諧。揚言曰。吾儕好醜區別。相公不一。一細鞫以。此激變。然反者不過數人。今已誅死。吾儕當面訴相公。汪令刑房吏諭曰。相公亦知汝曹非盡反者。然反者已死。可盡納器械。明當庭鞫。分別之。器械既出。於是召僧每十人一鞫。以次誅絕。至明百僧殲焉。究器械入獄之故。始知凌志等弊竇。而志等則已死於兵矣。又成都有奸獄。一曰和奸。一曰強姦。臬長不能決。以屬成都守魯公。公令隸有力者去婦衣。諸衣皆去。獨裏衣。婦以死自持。隸無如之。何公曰。供作和姦。蓋婦苟守貞衣。且不能去。况可犯邪。又韓滉在潤州。夜與從事登萬歲樓。方酣。置杯不悅。語左右曰。汝聽婦人哭乎。當近何所。或對在某橋某街。詰朝命吏捕哭者。訊之。信宿獄不具。吏懼罪。守

於屍側忽有大青蠅集其首因發髻驗之果婦私於鄰醉其夫而釘殺之吏以爲神因問晉公云吾察其哭聲疾而不憚若彊而懼者

質庫僞銀案

慕容彥超爲秦寧節度使好聚斂在鎮常置庫質錢有姦民爲僞銀以質者主吏久之乃覺彥超陰教主吏夜穴庫垣盡徙金帛於他所而以盜告彥超卽榜市使民自言所質以償於是民爭來言遂得質僞銀者

騙者自承

衡州新鄉縣令裴子雲好奇策部人王敬戍邊留犍牛六頭於舅李進處養五年產犢三十頭例十貫已上敬還索牛兩頭已死只還四頭老牛餘並非汝牛生總不肯還敬忿之投縣陳牒子雲令送敬付獄禁叫追盜牛賊李進

進惶怖至縣吐之曰賊引汝同盜牛三十頭藏於汝家喚賊共對乃以布衫籠敬頭立南牆之下進急乃吐款云三十頭牛總是外甥持牛所生實非盜得雲遣去布衫進見是敬曰此是外甥也雲曰若是卽還他牛進默然雲曰五年養牛辛苦與數頭餘並還敬一縣服其精察

### 以刀偵犯

劉崇龜鎮南海之歲有富商子少年而白皙稍殊於稗販之伍泊船於江岸上有門樓中有一姬年二十餘豔態妖容非常所覩亦不避人得以縱其目逆乘便復言某黃昏當詣宅矣無難色領之微哂而已旣昏暝果啓扉伺之比子未及赴約有盜者徑入行竊見一房無燭卽突入之姬卽欣然而就之盜乃謂其見擒以庖刀刺之遺刀而逸其家亦未之覺商客之子旋至方入

其戶即踐其血怯而仆地初謂其水以手捫之聞鮮血之氣未已又捫着有人臥遂走出徑登船一夜解維比明已行百餘里其家跡其血至江岸遂陳狀訟之主者窮詰岸上諸人云其日夜有某客船一夜徑發即差人追及械於圍室拷掠備至具實吐之唯不招殺人其家以庖刀納於府主矣府主乃下令曰某日大設合境庖丁宜集於毬場以候宰殺屠者既集乃傳令曰今日既已可翌日而至乃各留刀於廚而去府主乃命取諸人刀以殺人之刀換下一口來朝各令詣衙請刀諸人皆認本刀而去唯一屠最在後不肯持刀去府主乃詰之對曰此非某刀又詰以何人刀即曰此合是某乙者乃問其住止之處即擒之則已竄矣於是乃以他囚之合處死者以代商人之子侵夜斃於市竄者之家旦夕潛令人伺之既斃其假囚不一兩夕果歸家即

擒之具首。殺人之咎。遂置於法。商人之子。夜入人家。以姦罪杖背而已。彭城公之察獄。可謂明矣。

### 以屍易婦

昔有人因他適。回見其妻。爲姦盜所殺。但不見其首。支體俱在。旣悲且懼。遂告於妻族。妻族聞之。遂執壻而入官。丞行加誣云。爾殺吾愛女。獄吏嚴其鞭捶。莫得自明。泊不任其苦。乃自認殺人。甘於一死。欺案旣成。皆以爲不謬。郡主委諸從事。從事款而不斷。謂使君曰。某濫膺幕席。誠宜竭節奉理。人命一死。不可再生。苟或誤舉典刑。豈能追悔也。必請緩而窮之。且爲夫之道。孰忍殺妻。况義在齊眉。曷能斷頸。縱有隙而害之。盍作脫禍之計也。或推病殞。或託暴亡。必存屍而棄首。其理甚明。使君許其讞。義從事。乃別開其第。權作狴。

牢慎擇司存移此繫者細而劾之仍給以酒食湯沐以平人待之鍵戶棘垣不使繫於外然後遍勘在城伍作行人令各供通近來應與人家安厝墳墓多少去處文狀既而一面詰之曰汝等與人家舉事還有可疑者乎有一人曰某於一豪家舉事共言殺却一奶子於牆上昇過凶器中甚似無物見在某坊發之果得一女首級遂將首對屍令訴者驗認云非也遂收豪家鞠之豪家伏辜而具款乃是殺一奶子函首而葬之以屍易此良家之婦私室蓄之豪士乃全家棄市吁伍辭察獄得無愼乎

以術辨盜

陳述古密直知建州浦城縣日有人失物捕得莫知的爲盜者述古乃給之曰某廟有一鐘能辨盜至靈使人迎置後閣祠之引羣囚立鐘前自陳不

盜者摸之則無聲爲盜者摸之則有聲述古自率同職禱鐘甚肅祭訖以帷帷之乃陰使人以墨塗鐘良久引囚逐一令手入帷摸之出乃驗其手皆有墨唯有一囚無墨詰之遂承爲盜蓋恐鐘有聲不敢摸也

### 井中屍

張杲卿丞相知潤州日有婦人夫出經數日不歸忽有人報菜園井中有死人婦人驚往視之號哭曰吾夫也遂以聞官公命屬官集鄰里就井驗是其夫與非衆皆以井深不可辨請出屍驗之公曰衆皆不能辨婦人獨何以知其夫收付所司鞫問果姦人殺夫婦人與其謀

### 竹叢屍

魏公應爲徽州司理有二人約以五更乙會甲家如期往甲至雞鳴往乙家

呼乙。妻曰。既相期。五更。今雞鳴。尙未至。何也。其妻驚曰。去已久矣。復回甲家。乙不至。遂至曉。遍尋蹤跡。於一竹叢中。獲一屍。卽乙也。隨身有輕齎物。皆不見。妻號慟。謂甲曰。汝殺吾夫也。遂以甲訴於官。獄久不成。有一吏問曰。乙與汝期。乙不至。汝過乙家。只合呼乙。汝舍乙不呼。乃呼其妻。是汝殺其夫也。其人遂無語。一言之間。獄遂具。

木工之冤獄

京師小木局木工數百人。官什伍其人。置長分領之一工。與其長爭長曲。不下工。遂絕不往來。半歲。衆工謂口語非大嫌。釀酒肉強工造長。居和解之。乃歡如初。暮醉散去。工婦淫。素與所私者謀。戕良人。不得聞。是日以其醉於讎。而返也。殺之。倉卒藏屍。無所室。有土榻榻中空。蓋寒。則以厝火者。迺啓榻。輒

寘屍楊中空。陘割爲四五。始容焉。復輒故。所明日。婦往長家。哭曰。吾夫。昨不歸。必而殺之。訟諸警巡院。院以長仇也。逮至。榜掠不勝。毒自誣服。婦發喪。成服。召比丘修佛事。哭盡哀。院詰長屍處。曰棄塚中。責作。作二人。索之。塚弗得。作作本治喪者。民不得良死。而訟者主之。是故常也。刑部御史京伊交促。具獄甚急。二人者。期十日得屍。不得。答既乃。竟不得。答期七日。又不得。期五日。期三日。四被答。終不得屍。而期益近。二人歎惋。循塚相語。答無已時。因謀別殺人。應命。幕坐水旁。一翁騎驢渡橋。犄角擠墮水中。縱驢去。狀不類。不敢輒出。又數受笞。沙旬餘度。翁爛不可識。舉以聞院。召婦審視。婦撫而大號曰。是矣。吾夫死。乃爾若耶。取夫衣。招魄塚上。脫筭珥具。棺葬之。獄遂成。院擬長死案上。未報。可騎驢翁之族物色。翁不得一人。負驢皮道中。過宛然。其所畜。

奪而披視血皮未燥執愬於邑亦以鞠訊慘酷自誣劫翁驢翁拒而殺之屍藏某地求之不見輒更曰某地辭數更卒不見負皮者瘐死獄中歲餘前長奏下縛出狴犴衆工隨而譟若雷雖皆憤其寃而不能爲之明環視無可奈何長竟斬衆工愈哀歎不置徧訪其事無所得不知爲計乃聚議哀交鈔百定處處置衢路有得某工死狀者酬以是亦寂然無應者初婦每修佛事則丐者至至求供飯一故偷常從丐往乞一日偷將盜它人家尙蚤不可旣熟婦門戶乃閤中依其垣屋以須迫鐘時忽醉者踉蹌而入酗而怒婦詈之拳之且蹴之婦不敢出聲醉者睡婦微諄燭下曰緣而殺吾夫體骸異處土榻下二歲餘矣榻旣不可火又不敢摸治吾夫尙不知腐盡也否今乃虐我歎息飲泣偷立牖外悉得之默自賀曰奚偷爲明發入局中號於衆吾已得某

工。死。狀。速。付。我。錢。衆。以。其。故。偷。不。肯。曰。必。暴。著。乃。可。遂。書。合。分。支。與。偷。且。俾。衆。遙。隨。我。往。偷。陽。被。酒。入。婦。舍。挑。之。婦。大。罵。丐。敢。爾。鄰。居。皆。不。平。偷。將。毆。之。偷。遽。去。土。榻。席。板。輒。作。欲。擊。鬪。狀。則。屍。見。矣。衆。工。突。入。償。偷。購。反。扭。婦。送。官。婦。吐。實。醉。者。則。所。私。也。官。復。窮。壕。中。死。人。何。從。來。伍。作。供。擠。何。物。騎。驢。翁。墮。水。伍。作。誅。婦。泊。所。私。者。磔。於。市。先。主。長。死。吏。皆。廢。終。身。官。知。水。中。翁。卽。鄉。庚。死。者。事。然。以。發。之。則。吏。又。有。得。罪。者。數。人。遂。寢。負。皮。者。寃。竟。不。白。此。延。祐。初。事。也。校。官。文。謙。甫。以。語。宋。子。宋。子。曰。工。之。死。當。坐。者。婦。與。所。私。者。止。耳。乃。牽。聯。殺。四。五。人。此。事。變。之。殷。也。解。仇。而。伏。歐。刀。逃。笞。而。得。刃。伍。作。殺。而。工。婦。空。負。皮。道。中。而。死。桎。梏。赴。盜。而。獲。購。此。又。鞣。鞣。而。不。可。知。者。也。悲。夫。

雙釘記

姚忠肅公至元二十年癸未爲遼東按察使武平縣民劉義訟其嫂與其所私同殺其兄成縣尹丁欽以成屍無傷憂懣不食妻韓問之欽語其故韓曰恐頂顙有釘塗其迹耳驗之果然獄定上讞公召欽諦詢之欽因矜其妻之能公曰若妻處子耶曰再醮令有司開其前夫棺毒與成類并正其辜欽慄卒時比公爲宋包孝肅公拯云

化裝假面之盜

並至元間盜入浙省丞相府是夕月色微明相於紗帷中窺見之美髭髯身長七尺餘時一侍姬亦見之大呼有賊相急止之曰此相府何賊敢來蓋虞其有所傷犯故也縱其自取七寶繫腰金玉器皿席捲而去翌日責令有司官兵肖形掩捕刻期獲解沿門搜索終不可得越明年纔於紹興諸暨州敗

露。掠。問。其。情。乃。云。初。至。杭。寓。相。府。之。東。相。去。三。十。餘。家。是。夜。在。外。大。醉。歸。倒。於。門。外。主。人。扶。掖。登。樓。而。臥。須。臾。嘔。吐。狼。藉。滿。地。至。二。更。開。樓。窗。緣。房。簷。進。府。內。脚。履。尺。餘。木。屨。而。帶。優。人。假。髻。既。得。物。直。攜。至。江。頭。置。於。白。塔。上。復。回。寓。所。侵。晨。邏。者。至。察。其。人。酒。尙。未。醒。酣。睡。正。熟。且。身。材。侏。儒。略。無。髭。髻。竟。不。之。疑。數。日。後。方。攜。所。盜。物。抵。浙。東。因。此。被。擒。盜。亦。有。道。其。斯。之。謂。歟。

### 王令治獄

萬。歷。間。海。鹽。令。王。臨。亨。治。獄。多。精。察。有。一。婦。早。孀。隨。母。兄。往。來。海。鹽。崇。德。間。有。三。惡。少。一。冒。婦。之。叔。一。僞。爲。夫。一。僞。爲。其。夫。之。兄。詭。詞。訟。縣。已。而。佯。以。和。請。月。餘。僞。夫。訟。婦。之。母。兄。掠。婦。去。公。覆。前。案。良。是。而。訝。其。貌。狼。鞞。之。則。前。案。悉。僞。也。三。人。伏。辜。又。一。女。未。嫁。少。年。求。之。其。父。不。許。誣。以。娶。而。更。嫁。婚。書。媒。

聘。悉。具。公。呼。女。前。與。語。已。而。遽。問。少。年。曰。汝。妻。手。中。有。疤。記。左。手。右。手。少。年。愕。然。遂。敗。沈。氏。兄。弟。皆。無。子。兄。富。先。亡。弟。貧。有。女。嫁。褚。升。兄。之。妻。常。虞。升。瞰。其。貲。俄。被。盜。賄。隣。人。誣。升。言。從。屋。上。來。去。所。遺。鞋。是。也。公。曰。壻。而。盜。何。必。登。屋。茲。方。六。月。何。必。衣。鞋。升。得。白。

諜搖

沈參將希儀屯柳州左右皆搖諜而無諜搖者沈以爲使官府人爲諜賊生疑於是陰求得與搖人商販者數十人假以買物召至府密謂之曰吾素知若輩通搖吾不罪若更與若銀爲販本若試爲我訶賊衆感甚乃人給銀五兩使益買物散入諸峒中諸搖雖凶暴樂役人然販者至則寒寒傳送護衛飲食恐損一販者則諸販不至是以雖絕棧深箐販者無所不歷每有動靜

販者輒先知奔走報公公厚賞販者而祕其事雖肘腋親近絕不得聞至期鳴銃者三則諸兵皆聚第謂之曰今日出某門而遣心腹人爲旗頭引諸軍諸軍買買行問旗頭旗頭不知曰然則汝何引我曰公強我往我漫往耳軍行千萬人其所往獨公與旗頭兩人知之而已頃之筍營設伏賊果至遇伏奔追殪之而已而賊寇他所則公軍又已在或絕遠村聚賊度官軍所必不至而潛寇則公軍又已先在賊始驚以爲神

### 搖間諜

沈公始至柳令諸搖得出入價買游嬉城中無禁諸搖時入見公公兒女撫之久之稍稍擇其巧便曉事者結以厚賞使訶賊後賊發其夥伍中輒報公公又厚賞之而間謂諸搖曰若見我若妻子何不來見夫人諸搖叩頭不敢

公曰。試令其來已而。搖婦五六人來。夫人好言慰勞。賞之針線包帕。諸物以銀簪。簪其頭。又命諸妾婢。灌之以酒。人數大碗。察羣婦中。其夫嘗以賊事報者。則又陰引之。他所慰勞之曰。若夫爲吾大人盡力良苦。私賞之。包帕銀簪。諸物倍於人前所賞者。而益以珍果美物。塞其袖中。又陰戒之。勿令人知也。諸搖婦既多得賞。又酒醉。踴躍舞手出府門。搖夫望見之。懽喜爭前掖而歸。巢自是諸搖婦來者。至數百人。夫人傾篋筐針頭線尾。皆盡。猶不能給。而夫大相戒。以勿令人知者。搖婦又洩之以所獨得珍果美物。誇諸搖婦。以爲夫人愛已。諸搖婦皆心羨。嗾其夫使報賊。冀已入府得珍果美物。而公間使人往諸巢中。陰以夫人之命。賜物。諸搖婦自是賊中消息。或諸搖不肯言。則搖婦嗾之。使言。或諸搖竟不宣言者。則諸搖婦自以使人至巢。賜物時。附耳語。

云若勿向我老公語也。

### 人造雷殛之奇聞

雍正壬子六月夜大雷雨獻縣城西有村民爲雷擊縣令明公晟往驗飭棺歛矣越半月餘忽拘一人訊之曰爾買火藥何爲曰以取鳥詰曰以銃擊雀少不過數錢多至兩許足一日用矣爾買二三十斤何也曰備多日之用又詰曰爾買藥未滿一月計所用不過一二斤其餘今貯何處其人詞窮刑鞠之果得因姦謀殺狀與婦並伏法或問何以知爲此人曰火藥非數十斤不能僞爲雷合藥必以硫黃時方盛夏非年節放爆竹時買硫黃者可數吾陰使人至市察買硫黃者誰多皆曰某匠又陰察某匠賣藥於何日人皆曰某曰是以知之又問何以知雷爲僞作曰雷擊人自上而下不裂地其或毀屋

亦自。上。而。下。今。苦。草。屋。樑。皆。飛。起。土。炕。之。面。亦。揭。去。知。火。從。下。起。矣。又。此。地。去。城。五。六。里。雷。電。相。同。是。夜。雷。電。雖。迅。烈。然。皆。盤。繞。雲。中。無。下。擊。之。狀。是。以。知。之。爾。時。其。婦。先。歸。寧。難。以。研。問。故。必。先。得。是。人。而。後。婦。可。鞫。此。令。可。謂。明。察。矣。

滴血作弊之說破

晉。人。有。以。貲。產。託。其。弟。而。行。商。於。外。者。客。中。納。婦。生。一。子。越。十。餘。年。婦。病。卒。乃。攜。子。歸。弟。恐。其。索。還。貲。產。也。誣。其。子。抱。養。異。姓。不。得。承。父。業。糾。紛。不。決。竟。鳴。於。官。官。故。憤。憤。不。諫。其。商。所。生。真。贗。而。依。古。法。滴。血。試。幸。血。相。合。乃。答。逐。其。弟。弟。殊。不。信。滴。血。事。自。有。一。子。刺。血。驗。之。果。不。合。遂。執。以。上。訴。謂。縣。令。所。斷。不。足。據。鄉。人。惡。其。貪。媚。無。人。理。僉。曰。其。婦。夙。與。某。私。呢。子。非。其。子。血。宜。不。

合衆口。分明具有徵驗。卒證實姦狀。拘婦所歡。鞠之亦俯首引伏。弟愧不自容。竟出婦。逐子竄身逃去。貨產反盡。歸其兄。聞者快之。按陳業滴血見汝南先賢傳。則自漢已有此說。然余聞諸老吏曰。骨肉滴血必相合。論其常也。或冬月以器置冰雪上。凍使極冷。或夏月以鹽醋拭器。使有酸鹹之味。則所滴之血入器。卽凝。雖至親亦不合。故滴血不足成信。讞然此令不刺血。則商之弟不上訴。商之弟不上訴。則其婦之野合生子亦無從而敗。此殆若或使之未可。全咎此令之泥古也。

### 借磨察姦

龔勉字毅。所知秀水。未至縣六十里。泊舟村僻處。月夜見水草中有沈屍。命舟人入水細察之。背繫一磨。粉石上。并戒勿泄。亟遣一家。嫗持米登岸。借磨。

作粉有少婦出。應云：吾家磨石不全，視之止存下牙。嫗走白，乃密訪其姓名。至縣立擒此婦，問其夫安在。曰：賈於外，纔出門三日。訊其鄰如婦言，問有誰來往。鄰曰：有某在立擒之。拍案曰：汝何得與此婦作姦而殺其夫？沈水底乎？其人駭服，遂各正典刑。

僕婦串盜之黑幕

京師一大家富於貲，傭一僕婦爲昌平州人。服役有年，性甚黠，能得主人心。故主婦頗委任之。凡金帛所藏，悉與知焉。一夜人定後，有盜六人自屋而下，皆塗面執刃，羣僕驚逸。此婦聞聲趨出，爲盜所執，以刃擬其頸，曰：爾主人何在？曰：值內班未歸。盜揮其徒曰：速縛其主婦來。婦跪而泣曰：主母遇我厚，願勿嚇之。我願以身代盜。曰：旣如此，爾但告我金帛所在。婦囁嚅不欲言。盜舉

刃欲斫之。婦大駭。乃具告焉。盜收括既已。意猶未足。復以刃脅使盡言。婦曰。金帛盡矣。尙有珠寶首飾在某所。於是盜又盡取之。笑謂婦曰。汝所言未必盡實。念汝頗忠誠。姑留餘地。乃呼嘯而去。主母深感此婦。出而慰謝之。而婦則面色如土。不作他語。連呼嚇殺嚇殺而已。比曉。主人歸。知狀。亦慰謝之。然念婦雖爲盜所劫。何必盡情洩露。當惶遽時。乃纖悉不遺如此乎。且僕婦甚多。何以獨劫此婦。其事似有可疑。而婦自此卽云驚悸成疾。越三日。以病重告歸。主人重賞而遣之。密遣幹僕尾之行。婦初臥車中。出齊化。卽自起。遣車反而別雇一車。以行至昌平州某村止焉。有數人迎門而笑。婦亦笑而入。僕卽奔告於官。遣役偕往。時已半夜。奪門而進。則婦正與衆分所盜之物。金帛首飾俱在。縛送官。論如律。

拐殺伏誅

江西鄱陽縣民葉佐恩娶同縣徐姓寡婦陳氏爲妻生一子曰福來佐恩死遺腹又生一子曰福得陳氏不能守贅同縣嚴磨生爲壻磨生與陳氏居葉氏者五年始偕妻挈其前夫之二子以歸葉佐恩所遺田二畝歸嚴磨生耕種以養其二子屢荒於水衣食不贍而福來亦已九歲矣乃送至坑下村徐茂拐子家使學習裁縫每年與錢三千四百未幾又送福得至坑下劉光裕家爲之牧牛其地距嚴氏所居曰車門湖者四十里光緒三年十二月二十五磨生至坑下村接福來福得回家度歲二十六日晨起蓐食而行福來負藍布袋內盛洋錢一銅錢千福得負白布袋盛米數升行至塢上亭遇雨而磨生又發痰病乃於亭中稍息適遇雷細毛者擔兩籬而至雷亦坑下劉氏

之。傭。自。劉。氏。歸。其。家。其。所。居。與。嚴。相。近。也。磨。生。曰。我。病。不。能。興。當。使。二。子。從。君。先。行。我。小。愈。卽。至。乃。以。錢。米。并。置。雷。之。籬。內。雷。與。二。子。俱。行。至。鴛。鴦。垠。語。二。子。曰。我。與。若。至。此。分。路。若。可。坐。此。待。爾。翁。偕。歸。我。去。矣。反。其。錢。米。於。二。子。而。歸。而。磨。牛。猶。臥。亭。中。久。之。病。愈。雨。止。天。亦。薄。暮。乃。走。問。道。徑。歸。其。家。已。逮。乙。夜。矣。問。其。妻。知。二。子。未。至。次。日。使。嚴。復。仿。走。問。雷。細。毛。知。在。鴛。鴦。垠。相。失。求。之。鴛。鴦。垠。左。右。無。有。也。上。灣。林。有。歐。陽。六。毛。者。言。於。二。十。七。日。遇。二。稚。子。問。途。約。略。指。示。之。然。問。途。之。後。亦。不。知。所。之。又。有。汪。同。興。者。啓。布。肆。於。路。旁。言。二。十。七。日。有。二。稚。子。因。饑。餓。向。汪。素。食。汪。飯。之。而。去。問。飯。畢。焉。往。不。知。也。問。有。見。者。無。曰。有。歐。陽。發。仿。者。適。在。肆。中。二。子。出。亦。出。或。當。見。之。二。十。八。日。始。乃。得。二。子。之。屍。於。陳。公。坂。福。來。傷。於。顛。傷。於。耳。傷。於。咽。喉。福。得。并。傷。於。腎。

錢米俱在無所失。陳公坂距車門湖二里而近。莫知爲誰所殺。或曰歐陽發。仿也。或又曰歐陽絲林也。於是嚴磨生乃以歐陽絲林歐陽發仿控於官。而葉氏之族則曰是嚴磨生利其故父所遺之田而自殺之也。亦控於官。訟久不決。光緒四年彭雪琴侍郎巡江至饒。嚴葉皆具諜訴於行轅。發饒州府訊之。六年夏侍郎至江西省垣。中丞以下咸迎候於滕王閣。而嚴磨生之妻陳氏又以前事訴前馬者。斥之則自投於江。侍郎急命拯之。起受其牘言於中丞。而豫章諸大吏久知其事。咸疑嚴磨生實殺二子。謂二子年幼必無仇殺者。若利其有則何以錢米俱在。是其繼父殺之無疑也。故當侍郎未至之先也。命移其獄至省中治之。而鄱陽令汪君以誠者賢令也。初下車歎曰。境有此獄而卒不得殺人者。主名上爲大府憂焉。用縣令爲時案中。人證咸羈管。

縣中汪君密使偵者於諸人一舉一動一語一言隨時伺察至是年五月民間傳言彭侍郎巡江且至將親臨郡城審斷冤獄而歐陽發仿聞之卽自疑頻向丁役探問消息是月十六日侍郎至先是有浮梁沈可發私刻木印偽造執照自稱曾在侍郎營中侍郎提審得實卽以軍法斬之而歐陽發仿愈懼其夜夢中嚙語連稱不好者再汪君得其狀知殺人者必歐陽發仿也乃於密室供城隍神之位而禱焉夜夢至一處聞屍臭而不見屍有一人以身覆之視之歐陽發仿也及日躬率諸囚詣神廟而訊之謂歐陽發仿曰爾實殺人神已告我矣發仿雖不卽承而神大變越日又訊於城隍廟諸囚皆號哭求神明昭雪歐陽發仿無一言夜將半則大呼曰吾不敢欺神明請吐實蓋鴛鴦坵距車門湖尙三十餘里二十六日之夜二子宿於鴛鴦坵之社廟

中。明。日。前。行。遇。歐。陽。六。毛。而。問。途。焉。又。前。行。飯。於。汪。同。興。布。肆。而。歐。陽。發。仿。見。其。幼。稚。可。欺。欲。誘。至。他。所。而。賣。之。乃。追。及。之。而。與。之。同。行。且。請。爲。導。導。至。已。家。宿。之。牆。外。土。室。中。雖。其。家。人。無。知。者。二。十。八。日。平。明。復。招。之。偕。行。行。至。陳。家。坂。則。離。車。門。湖。近。矣。福。來。已。識。之。登。山。而。望。見。其。村。不。肯。與。歐。陽。發。仿。偕。歐。陽。發。仿。強。挽。之。則。大。罵。乃。痛。毆。其。頭。面。又。扼。其。吭。而。死。福。得。且。走。呼。曰。殺。吾。兄。矣。蹴。以。足。傷。其。腎。亦。殺。之。發。青。白。二。布。袋。見。錢。與。米。棄。之。地。不。取。蓋。恐。以。此。爲。人。所。蹤。跡。也。汪。君。鞠。其。實。卽。馳。白。侍。郎。侍。郎。時。在。焦。山。自。然。庵。聞。之。狂。喜。手。批。其。牘。有。云。數。年。鬱。結。爲。之。頓。釋。望。空。遙。拜。爲。兩。冤。魂。叩。謝。賢。令。君。天。下。多。覆。盆。而。有。司。安。得。如。此。盡。心。歟。又。不。禁。感。慨。係。之。

姪欲占媿

貴筑高廷瑤宦游紀略載有鳴冤者問之則曰叔係江監生家雇工配其使女叔已死今迎叔母歸家江監生不允叔在江家時存有銀兩衣物若干皆不給還余曰爾叔存銀物有字據乎曰無爾叔在江家幾年曰八九年有子乎曰無爾叔母若干歲曰將三十爾有妻室乎曰無然則接叔母安歸乎曰另租房爾今年若干歲曰三十一歲然則爾叔母無子同居一室遂爲夫婦乎抑賣與他人乎面赤不言余曰爾叔果有錢必不與人作雇工配人使女爾叔既死爾叔母仍是江家使女豈有准汝接回之理重責之當時驅逐

### 偵破串陷案之手續

高廷瑤在六安州憐快役稟獲竊賊二名衣三件懷城內楊家失物已認贓具領在外伺候令傳楊領衣訖隨訊賊是何處人曰壽州問到六安幾年做

賊幾次窩戶。何人曰到六安三年竊此一次卽被獲窩戶。是某村某家高曰。三年作賊一次不幾成餓殍耶。令押候隨筆記所供窩戶之里居姓名。蓋六安差役之指使誣陷人者曰某某窩戶某某收贓謂之賊案。開花然富而有勢者不敢誣有功名者不敢誣惟良善稍可存活者得而魚肉焉。數日後因公往鄉回過某村地保叩迎問爾村中有某人否曰有令導往行至難乘輿處乃步行至某門首其人跪接年約四十餘歲諭云聞爾勤耕守分故來此一觀田家風景耳爾家有幾人曰有妻生子一女二皆幼問妻姓氏有無父母見居何村皆一一備述遍視其居屋倉房俱頗齊潔園圃空地亦皆修整是務農而稍可過活者因諭云爾乃良民第安執業倘有人來嚇詐許爾扭稟毋須叩送矣及回署進頭門暫住轎令快役提前日竊賊隨轎至大堂訊

其窩戶之門房牆院供脰合復訊爾在伊家與伊妻見面伊妻有父母往來否見居何處是何姓氏則茫不能答高曰豈有處其家三年而不知其妻之姓氏者乎豈有妻之父母往來而不知其住處者乎嚴究之係快役教之誣扳重責快役並枷號示衆此後審賊快役一同畫供誣良之風息焉又問案時有人喊控某監生窩賭有骰盆骰子爲據右手持盆左手握骰呈驗並稱某某同賭令其人上前解衣查看汗衣角有裏摺新痕以六骰置裏摺處悉相合毫髮不差問這骰子六顆是某監生之賭具乎抑是爾拏來誣陷某監生者乎其人俯首無辭嚴鞫而重懲之蓋其人藏骰身邊以便隨時聚賭又因某監生家素稱殷實柔懦可欺是以設局陷害如不細心檢查鮮不爲其所騙矣

嘉慶間謀死親夫之大偵探案

嘉慶十二年安徽霍邱縣招解民婦范顧氏同姦夫楊三等謀死親夫范壽子燒屍滅跡一案連血衣殘骨兇器招解到司廉訪李書年先生恐有冤抑駁提屍親證佐到省委高廷瑤與某令研訊各供相符廉訪隔屏諦聽曰供情似真矣某令曰供情結實衣骨兇器確鑿案不錯高曰僞也廉訪曰何以知之高曰范壽子贅於岳家正月十三夜同妻母弟諸人出觀燈燈散回家鄉間雖無更鼓應有二更時分矣又他往鬪牌返時已三更矣返後范顧氏與楊三及母弟諸人商定各持械將范壽子兇毆致死時已四更矣又將屍支解煮成肉汁撈骨燒灰然後棄埋漫地人肉未經煮過豬肉則所常食每烹煮必須一二時方熟若要熬成肉汁非一晝夜不能四更至五更爲時

幾何此不確之大端也。况范願氏母家住居集中。前後左右各有緊貼鄰舍。死者被毆。豈無聲息。焚骨臭味。豈無見聞。此理之易明而事之所必無者也。時已交三鼓。廉訪曰。明日再細心鞫之。次日復訊。某令請病假不來。高乃喚屍父至前曰。汝媳罪擬凌遲。楊三斬決。媳母媳弟及雇工三人皆擬絞候。冤乎不冤。屍父曰。無冤。高曰。汝媳與諸人正法。後設汝子出則五人之命應汝抵償。汝願具結乎。屍父曰。我止告子。贅不歸。所有因姦謀死之情。乃官審定。與我何干。余將全案一一研訊。俱如昨供。打死後砍成八塊肉。煮化了骨。燒了。尚存零碎骨數塊。可據天衣無縫。欲雪無從。乃沈吟久之。因案關五命。哀矜之心。不覺見於顏色。范願氏及其弟願三。麻子忽然叫冤。高曰。壽子之屍地方官詳報。是煮了燒了。今日壽子若是在。固可伸冤。即使已死。或是全屍。

亦可從此根究。今日既不知屍身所在。爾曹又未供有別故。何以見得冤。顧三麻子曰。地保同犯人一路來省。他說此案實在冤枉。高曰。地保昨日審過。如有冤枉。豈不供出。僉曰。解差再三諄囑。按察司衙門審案。如有翻供者。就夾一夾棍。因此地保不敢直說。卽提地保問曰。此案是官訪聞。是屍親告發。地保曰。是屍父四月初來縣告狀。官差頭役李遙。協同小人查訪。禽曰。訪得何如。地保神色驚懼。囁嚅不言。掌責之地保曰。小人實供。五月初十外。小人同李遙。查至壽子姨父陳大鳳家。大鳳外出。伊妻說壽子十五來拜年。指廂房云。在這間房宿。十六喫早飯。方去。高曰。此等情節如何。不稟官。答云。未見官。是以未稟。不知李遙曾稟否。提李遙問之地保。謂李遙曰。這裏審案。不比府縣。我已將訪得實情。供了。李遙所供無異。高曰。汝稟官否。李遙曰。小人查

訪。回。時。捕。衙。官。已。問。成。賚。了。燒。了。官。未。見。面。是。以。未。稟。楊。三。聞。之。供。曰。犯。人。實。未。殺。死。范。壽。子。因。捕。衙。官。問。犯。人。要。屍。犯。人。何。處。尋。得。屍。來。熬。刑。不。過。亂。供。數。處。第。一。次。起。不。出。屍。來。鞭。背。二。百。第。二。次。鞭。一。百。第。三。次。夾。一。夾。棍。犯。人。沒。法。就。供。說。屍。是。砍。成。八。塊。賚。了。燒。了。高。曰。汝。一。人。誣。服。顧。氏。諸。人。何。以。誣。服。顧。氏。乃。與。諸。人。僉。供。熬。刑。不。過。是。以。誣。服。壽。子。既。十。五。尙。在。十。三。之。未。死。可。知。稟。提。陳。大。鳳。到。省。訊。之。果。確。遂。逐。層。駁。詰。按。名。細。訊。原。審。情。節。盡。屬。子。虛。詰。其。血。衣。兇。械。殘。骨。從。何。而。來。原。役。曰。因。官。比。急。始。令。楊。三。諸。人。家。屬。用。豬。血。染。衣。取。家。中。刀。錘。及。荒。塚。內。朽。骨。送。官。作。據。耳。高。復。於。廉。訪。將。五。犯。提。禁。保。候。飭。縣。確。查。范。壽。子。蹤。跡。此。嘉。慶。十。二。年。十。月。事。十。三。年。十。二。月。范。壽。子。自。河。南。回。而。五。人。之。奇。冤。始。雪。

道光間粵桂大偵探案

羅定在省西南七百里。自端州德慶塔下橫渡入江口。山環水繞。地瘠民貧。所屬東安西寧兩邑。處處與西粵相通。每有外來賊匪勾結土棍肆行劫掠。迨官司掩捕。則潛逃隔省。莫可追禽。實盜藪也。道光三年。州牧詳報。民某被盜。訪知盜首黃瓜四窩。藏廣西岑溪縣黎維祺家。經文武前往查拏。被窩主奪犯拒傷。兵役制軍移檄西省。將窩主黎維祺等二十餘人禽獲。解東委首府審訊。經年不決。西省方伯致書東省。兩司謂西撫面諭此案虛實。當令臬司細鞫。俾無枉縱。桂林府同知王君因公來粵。制軍委其會審。八月高廷瑤捧檄重來。藩臬請於督撫。卽以此案委高查核。全卷情節支離。意此中殆有冤乎。然猶不敢預存成見。必訊之而後定。於是至首郡公廨。先提州役次提

兵丁又提往捕之。把總胡成韜及證佐諸人分爲五處。隔別研訊。先提兵二名。問曰：爾曹拏黃瓜四。是何時候？誰在前？誰在後？在黎家門外拏獲。抑在家中拏獲？兵某曰：是日晨刻時候。兵與役在先。胡某在後。在黎家廳房內拏獲。另提二兵。問之。則以爲時已五鼓。天未明。黃瓜四尙未起來。兵與役是在臥牀上拏獲。又提二兵。問之。則以爲在門外拏獲。提州役三人。問之。則以爲營兵已拏獲。在先役後。趕到。傳胡成韜。問之。則以爲是州差拏獲。錄供一一。畫押。使其不能翻異。齋復問曰：盜首黃瓜四果在黎家拏獲乎？胡曰：已拏獲。被維祺兄弟糾約數十人。將犯人奪去。某同兵役俱身被重傷。齋大笑曰：爾曹拏黃瓜四果是在廳房拏獲。則衆供均是廳房。何以或供廳房。或供臥內。或供門外。又或供辰刻。或供五鼓。天尙未明也。何以兵則供是兵。拏獲州役則

供未經趕上而胡成韜又謂專是州役拏獲也此案黎家並未窩藏盜首爾曹亦未見黃瓜四之面分別五起問供供詞各異其爲誣捏陷害可知爾曹口供均已畫押豈能翻異立將胡成韜頂戴摘去卽嚴訊兵役始供黎家實未窩藏因嚇詐伊錢四十千不給與胡商議以奪犯毆官并傷兵役重罪害之錄供又命其一畫押兵役倉皇失色胡成韜則免冠叩頭高怒曰縱盜抗官罪干大辟爾旣捏報誣良應卽以其罪罪之旋言於督撫兩司請以此案平反僉稱不可高曰假令盜在其家是爲窩盜官兵往捕不行縛送反敢縱逸羣毆是爲抗拒今訊明並未藏盜在家則兵役平空捏誣傾陷二十餘人安得謂之拒捕哉若意存周內枉殺平人何忍爲此大府聞齋言心動提犯復訊無異奏請將把總兵役分別流徒枷杖州牧請交部議嗣獲黃瓜四

訊之果未至。岑溪黎家益信平反之不虛也。

### 咸豐間浙江大偵探案

前清咸豐初年。浙江臬司段光清。素有神仙之稱。稱爲神仙者。謂其吏治神。非真謂其具有仙術也。相傳段初以名進士。出宰浙東之江山縣。是縣爲閩浙交界。山川叢雜。區域遼闊。椎埋亡命之徒。嘯聚其間。命盜案月凡數十起。此拿彼竄。號稱難治。段蒞任以後。設法搜捕。年餘。鮮有倖脫者。然其緝捕之法。亦無奇異。唯知其性情和藹。紳民晉謁。無不延納。語多坦率。又往往周巡四鄉。於道里遠近。及阨塞處。另以小冊登記。曰予以備遺忘也。其後盜發某處。段卽以意爲指揮。至輒擒獲。由是能吏之名。傳播遐邇。秩滿調任繁缺。未幾改任福建閩縣。閩縣政務繁劇。爲通省冠。且地鄰海澨。殺人奪貨之事。

無日無之。段卽以治江之法治之。盜乃斂跡。先是有一盜。拘獄數年。遇赦得釋。詎釋出後。劫掠如故。段索之急。乃遁往他所。時有疑是盜爲段賄縱者。段聞之。亦不置辨。段仕閩。亦爲閩省大吏所信任。然以其不善逢迎之故。同僚中。遂有覬覦其缺者。羈飛短流長。段幾不安其位。時有新任某督至。督本旗人。年少忌才。而段又爲首縣。不時晉謁。稟白要公。持論侃侃。不少阿諛。某督惡之。將欲借蜚語以中傷之。然又慮其無實據。遲疑未發。忽一日。督屬簽押房。失去元絲銀七百錠。某督勃然大怒。曰。誰謂段令爲能吏。今我署且失去鉅款。其平日捕務廢弛。不稱厥職。已可慨見。立傳段至。大加申斥。臬司某素愛段才。聞信馳往。力爲營救。督怒稍解。段亦承認罰賠。督不允。必欲令段緝盜。追回原贓。段謂緝盜事。分所應盡。請予限期。定能獲案。某督謂多則一月。

少則二旬。意謂段必不能照辦也。段聞言。自請減限曰。多則十日。少則六日。某督意頗驚異。段又曰。先請賞允三件事。此案定當破獲。某督曰。汝可說明。何者爲三件。段曰。第一。准卑職飭縣署差役。團守督署四周。第二。凡出入大人衙門者。准由卑職飭人檢查其身畔。及其攜帶物件。第三。嗣後卑職晉謁。不拘時刻。不拘地點。均准賞見。請勿拒絕。某督均允其請。段歸署。幕僚均咎其非計。段不置可否。唯一面傳集全署胥差。令其至督署四周。日夜巡邏。准其更番替換。不准稍懈。違則不貸。胥差聞言。意欲聲明不能照辦之理由。段不待其辭畢。叱令之去。又傳幹役八人至。囑曰。汝等可按日。分作二人一班。至督署二門。分站兩旁。如見有暗藏重物。步履蹣跚者。當密誌其身軀容貌服飾。速以告我。毋庸實行檢查也。又選幹役數人。分往城內各錢店銀號。囑

其如有將某式某印某重量之元絲銀錠。到店兌換者。即將其人與銀。拘送縣署懲辦。部署訖。漏夜奔往督轅求見。某督已允其前約。拒之不得。卽招之入見。段不發一言。但見其目不轉瞬。注視屋之上下及四周。片刻辭出。次晨又復求見。某督適在簽押房。閤人未便攔阻。段卽直入見。則如前注視尤審。已復辭出。嗣後或一晝夜二三見。或三四見。其地點或內外簽押房。及各花廳。均聽其出入自由。莫能禁止。如是者三四日。某督苦之曰。汝胡不憚煩。乃爾。汝於此案。究竟有無頭緒。段惟唯而已。其幕僚均爲段危。謂段對於上官。如此惡作劇。儻不得盜禍必不測。段亦一笑置之。一日晨起。卽傳集衙役八人。諭令各帶刑具。齊赴督署。迨督出見。羣僕隨出。督欲發言。段卽大聲呼曰。止。盜在是。速將刑具來。縣役八人者。蜂擁入。卽隨段指定一人。立鎖其頸。

將欲牽出。某督大驚失色。卽以身庇之。問其何證據。段不答。喝令縣役。至某處花廳。將某炕床擡出。果見炕後鬆土內。藏有元絲銀一大包。數之得二百錠。段便問餘贓安在。盜不應。段曰。不用刑訊。諒不承招。卽向某督請示曰。帶往縣署用刑。抑在此間用刑。某督已驚其神異。曰。此間用刑亦無不可。盜聞言。面色慘變。曰。我其死乎。願卽承認。卽言餘贓分藏某某處。如言搜之。果符原數。某督不覺屈身與段爲禮。曰。我無知人之明。致君久屈下僚。我之過也。然君何以知是人爲盜。并先探得匿贓之處。願聞其詳。段曰。是不難。督署關防嚴密。署中簽押房何等重要。尤非外人所能混入。此處失銀。以意測之。必係梭行此處之人。方能落手。故此盜決其爲署內發生。毫無疑義。卑職於是。有第一第二兩策之要求。明知兩策均不能實行。不過虛張聲勢。使盜贓不。

敢遠卸復思督署僕役衆多就中孰爲真盜遽難指定於是卑職有第三之要求所以爲第三策之要求者誠知盜銀者旣爲日常行走簽押房之人其人心虛膽怯時恐卑職晉謁或獻密計揭破此案之真相此則於是人大爲不利意必卑職晉謁一次是人亦當窺探卑職一次其後迭次晉謁時是人果隨大人同出或斜倚門側或垂手屏後無時無地不有是人苟非心虛膽怯何以致此以此之故乃知是人確爲真盜至其匿藏之所卑職初見該處炕牀之下塵跡略有移動注視良久不料是人視線同時亦集於此次日又見該炕牀前面仍移原處時日光適斜射炕後忽見後面泥土有鬆動痕跡是人適立屏後是處爲彼之視線所不及且非至日斜時則炕後黑暗如故是一日之間彼所匿藏之處不過僅有數十秒時之敗露此正爲是人所

不。及。自。料。而。不。知。是。時。卑。職。心。中。已。蓄。有。一。疑。竇。其。後。特。候。至。日。斜。時。復。於。是。處。謁。見。是。時。卑。職。復。再。三。諦。審。無。誤。踰。時。日。影。已。過。而。是。人。始。出。故。其。贓。之。發。露。始。終。爲。是。人。所。不。料。凡。此。作。用。不。過。隨。時。隨。地。用。心。入。微。乃。能。收。最。後。之。效。果。耳。言。畢。某。督。欽。佩。無。已。旋。將。段。名。列。入。薦。牘。不。數。載。洊。升。至。浙。江。按。察。司。時。仁。和。縣。有。一。餘。杭。重。犯。已。奉。部。議。斬。決。由。京。解。回。寄。監。一。二。日。將。發。往。犯。事。地。方。梟。首。示。衆。至。此。忽。越。獄。逃。脫。仁。和。令。愁。急。萬。分。幕。僚。各。爲。謀。詳。報。解。釋。之。法。遲。之。日。暮。不。得。要。領。或。曰。事。急。矣。不。如。面。求。段。神。仙。聽。其。發。落。萬。一。得。其。垂。憫。或。有。解。救。仁。和。令。不。得。已。姑。從。其。計。叩。轅。求。見。時。已。魚。更。二。躍。矣。臬。轅。司。閤。者。以。夜。已。將。半。不。予。通。報。且。曰。吾。主。人。每。夜。披。閱。文。牘。例。須。至。夜。深。啖。粥。一。碗。乃。寢。今。何。時。乎。想。已。就。枕。多。時。矣。仁。和。令。懇。求。再。四。司。

聞者見其顏色愁慘。乃曰。吾姑入內探之。看汝運氣何如。言畢趨入。見一老嫗坐窗下。守候火爐。上燉一磁罐。知主人尙未進食也。喜躍而出。且告以哀求之法。遂引之入。段駭其突至。將欲詰責。未及啓口。仁和令卽長跪不起。但云。卑職糊塗。卑職該死。總求大人開恩。設法援救。言次。涕泣如雨。段爲心動。乃曰。汝姑言之。何以急迫乃爾。仁和令乃敘述要犯越獄事。段頓足歎恨。旣而沈思半晌。問何時逃脫。答本日下午四時。因徧索不得。不得已來此冒死求計。段聞言。又思索良久。乃曰。汝可速往距城二十里之某村。某姓名家。該犯正在薙頭。當可就獲。遲則不及。又言汝不必回署。可傳集我署中差役。與汝同往。並須易輿以騎。較爲迅速。言已。促令速行。仁和令不敢致詰。率之以往。時已四更。約行二十里許。見有一村。急向村口居民詢問。果有某姓名家。

尙溫飽。本爲此間土著。衆遂掩至其家。撞門而入。果見該犯薙頭已及其半。立時擒獲。仁和令驚喜交集。竊念段臬臺若非神仙。抑何神妙。乃爾。於是押解該犯。長驅入城。至時。天甫黎明。將息稍定。卽登轅謁段。自請嚴議。并詢前次指示方略。若非具有仙術。必不至此。段曰。我豈眞爲神仙哉。不過我之神經較汝等靈敏耳。大凡爲治之道。務須捐除物欲。然後靈明四澈。動輒奇中。汝曹一行作吏。必先計較。此缺之優劣如何。可多得盈餘如何。可獵取例外。迨官囊稍裕。往往廣置姬妾。沈溺鴉片。暇則品題書畫。評量鼎彝。自謂雅人。深致古時名吏。不過爾爾。於是授權幕吏。信任家奴。對於遞解過境各犯。向不親自過訊。親自點名。所有各犯姓名籍貫年貌及其所犯事由。概屬茫然。及時過事發。乃爲此不情之請。我豈眞爲神仙哉。我實告汝。當日此犯解到。

時我核其冊載事由疑此犯往返解審已經二次時閱四載家產迄已蕩盡何以面無菜色衣履整潔非有親朋贈給必不至是該犯乃言彼籍隸餘杭距省城二十餘里某村某人爲彼妻父家頗有餘憫我無辜受累頻年衣食資均由其供給且輸送甚便故得免於凍餒等語我當時聞之不甚措意及聞該犯有越獄事揣知犯人不更衣不薙髮逃必不遠因憶及前次該犯堂供并詢知逃脫時刻故料定該犯必先至其家更衣薙髮訖然後遠逸幸汝星夜趕往故能尅期就擒若延至天明則鴻飛冥冥矣仁和令聞言羞愧無地踉蹌辭出又一日段至武林門外接差中途忽令停輿手指路旁一人喝令隨行差役將是人拘回署中聽候訊辨是人不服段不理卒拘之以去後知拘去之人卽從前閩省遇赦釋出再犯嚴捕未獲之海盜當赦出時段與

該盜僅於堂訊時略識一面。不料該盜逃至杭州。其面貌尙在段之心目中。久而不忘。足見段之富於記憶力。尤非等閒可比也。其他類此者甚多。惟年代遙遠。傳者語焉不詳。不能綴述成篇爲憾耳。

偵探指南



中華民國十八年十一月九版

版權所有

編輯者

印刷者

發行者

分發行所

林占元

上海會文堂書局

上海會文堂書局

漢口黃陂街  
廣東雙門底  
北京楊梅竹斜街  
奉天鼓樓北  
濟南西門大街  
會文堂書局

總發行所上海  
河南海球場  
會文堂書局

偵探指南全一冊  
定價大洋四角

廉價

